

Ken na ATA a haya Performance Bonus di 24 mil Florin?

ORANJESTAD(AAN) Ministro Tico Croes cu awor ta encarga cu Departamento di Finanzas di Aruba a cuminsa pasa hacha den gastonan di gobierno.

Siman pasa e ministro di Finanzas a declara cu gobierno a cuminsa corta den gastonan di celular di ministronan y ta pesey aparentemente cada ministro lo haya solamente un celular y dos pager.

Den practica mester bay wak si esaki ta bay funciona pasobra ministronan na Aruba ta campeon den desvia di reglanan pa asina sea na un forma directo o indirecto tog gasta placa na nan antoho.

Ora cu gobierno nobo ta papia di corta gastonan y mester cuminsa reorganiza y

estructura departamentonan di gobierno, no mester lubida cu a bira tempo pa cuminsa cobra bek loke a worde paga di mas.

Informacionnan cu DIARIO ta hayando for di algun siman caba ta muestra cu cosnan straño a tuma lugar den ATA: oficina di Turismo di pais Aruba.

Manera cu DIARIO a publica caba, un festival a ser teni na Aruba y te awe ningun hende di ATA por duna cuenta di placa cu a bay perdi o ningun hende sa ki suma exacto a ser gasta cu World Youth Festival.

Te ainda tin hende cu no a haya nan pago pa servicionan presta na World Youth Festival y señor Chido Henriquez

cu a priminti prensa di investiga un ke otro relaciona cu e festival aki den termino di un luna di tempo, te awe despues di basta luna no por saca su som.

Al final ta e director di ATA Jan van Nes mester bay duna cuenta na e ministro di turismo nobo señora Lili Beke.

Segun rumornan cu ta core, un persona cu ta traha na ATA lo a haya un bonus basta gordo pa su trabaonan haci aña pasa.

Riba su mes no tin nada contra pa paga un yiu di tera un bon salario combina cu un bon bonus si e ta bon den su trabao.

Si por paga technische bi-jstandernan te cu 2000 florin pa dia pa nan sinta wak con pa kita werksternan di trabao, anto un yiu di tera cu sa su trabao tambe tin derecho pa riba cierto nivelnan gana un bon salario.

Otro e asunto ta bira ora cu cualkier director o empleado di gobierno tin un acuerdo cu gobierno, cu si cos bay bon e

ta haya un sorto di performance bonus y e ta haya esaki siendo cu cos a bay malo.

Despues cu dos trahado a haya nan mes den conflicto cu director di ATA cu a nenga nan di por sigui traha na ATA, otro trahadonan a cuminsa basha abao y a cuminsa cuestiona maneho di e director y e grupito cu tin den ATA cu por haci y deshaci manera cu nan ta haya ta bon.

Un di e preguntanan mas cayente tabata, si ta berdad cu tin un hende den ATA cu a haya 24 mil florin paga como performance bonus pa e aña cu a pasa?

Si turismo a florece manera cu e gobierno anterior tabata bisa pueblo y si den realidad esaki tabata asina cu pais Aruba a gana miyones cu turismo, anto gobierno por bien paga e persona 100 mil florin mes na bonus pasobra si e ta produci bon pa Aruba anto no tin nada contra pa paga bon: si por paga supuesto expertonan extranhero anto sigur mester por paga un yiu di tera

tambe mescos o te hasta mi-hor!!!

Pero na momento cu constatata cu cos no tabata dje bon ey den turismo, gobierno por hustifica un pago di 24 mil florin na performance bonus?

No tin placa pa remedi, pero si tin placa pa paga bonus di 24 mil florin?

Turismo di Aruba a bay malisimo aña pasa y ta di unda sali cu mester a paga bonus di 24 mil florin?

Ta ken den ATA aparentemente a haya 24 mil florin di performance bonus?

Ministro Beke por duna cuenta na pueblo encunto e pago di 24 mil florin aki na performance bonus?

No ta asina cu performance bonus ta worde paga solamente si por worde comproba cu cos a bay bon y cu placa a worde genera na grandi?

Si e pago a ser haci mientras cu cos tabata malo, no ta asina cu e gobierno di hende drechi cu a bolbe sinta, mester bay percura pa e placa aki bolbe den caha di gobierno?

Surnam a sera acuerdo cu Warda Costa Mericano

ORANJESTAD(AAN) Pais Surnam a sera un acuerdo cu autoridadnan Mericano pa laga Warda Costa Mericano persigui narco traficantenan te den awanan territorial di Surnam.

E problema di narco trafico na America Latina no ta un problema di America Latina so, pero di Merca tambe pasobra e mercado mas grandi caminda droga ta worde consumu ta na Merca y ta pesey e cooperacion y ayudo di autoridadnan Mericano mester ta mas grandi den e area di Caribe y America Latina.

Surnam no ta dispone di un armada grandi manera Merca y Warda Costa Mericano ta dispone di barconan, avionnan y helicopternan cu por persigui narco traficantenan 24 ora pa dia.

Cu e acuerdo sera cu Merca, Surnam a demostra di ta contribui na e lucha contra narco trafico y cu nan mes ta dicidi cu ken nan ta sera acuerdo y con y no manera cu tabata e caso na Aruba caminda gobierno di Aruba a entrega Warda Costa di Aruba pa asina autoridadnan local incluyendo gobierno mes no tin

nada di bisa mas den awanan territorial di Aruba.

NOS DIRECCION PA SIGLO 21!!

